

四庫全書

史部

欽定四庫全書

平定準噶爾方略前編卷三十

雍正十年夏五月甲子

命張體義赴肅州辦理運糧事務

上諭大學士等曰趙之垣著來京張體義著給與按察使銜前往肅州與副將馬龍一同辦理運糧事務

丁卯

命曉諭陝西甘肅二省官民等

上諭大學士等曰秦省民風醇樸朕所素知第因近年
以來有一二匪類捏造浮言妄冀鼓動衆聽誠恐無
知愚民一時不察被其迷惑是以特遣大臣官員等
開誠布公宣諭化導從前陝甘二省民人深知感戴
國家教養之恩今復悉西陲不得已用兵之處聆受
諭旨各皆開悟踴躍朕心深為嘉悅但軍興日久轉
粟飛芻不可再擾民力其輓運之價朕已屢次加添
近聞路徑僻遠之地尚有不敷又或採辦草豆等項

時價低昂不等是該督撫等尚不洞達朕意矣向後著悉心體察有應行奏聞者即據實陳奏朕自加恩不使官民等有賠累之苦著將此旨曉諭陝甘二省官民等共知之

戊辰

命以護軍統領阿思哈為前鋒統領赴西路軍營管轄滿洲兵以侍郎武格為揚武將軍赴巴里坤統轄巴里坤滿洲兵伊禮布為參贊協同武格辦

事以總督劉世明為副將軍統轄巴里坤綠旗
兵與武格馬會伯商酌辦理事務

命加賞巴里坤出征兵丁冬衣

上諭辦理軍機大臣等曰巴里坤出征之西安滿洲兵
三千名寧夏兵一千名出口已將二年冬衣不無敝
損應行加恩添補查莊浪現有存貯皮袍褂三千套
皮帽三千頂著署督查郎阿巡撫許容再於蘭州添
製皮衣一千套皮帽一千頂俱於秋間解送軍營賞

給西安寧夏滿洲兵以示朕格外加恩之至意

庚午

命停撤赴巴里坤京城驍勇官兵

上諭辦理軍機大臣等曰去年遣往巴里坤軍營之京城驍勇官兵一百名巴爾虎一百名原令於襲擊烏魯木齊旋師之後即行撤回此兵俱係精銳軍營現資差遣暫停撤回每人著再賞銀三十兩以為整理衣服等物之用

丙子

議察哈爾移居蒙古等編設佐領事宜

散秩大臣塞楞等奏言臣等至察哈爾會同各
總管遵

旨查明八旗諸王大臣官員等所進蒙古及移居就食
蒙古計八百餘戶選其諳練騎射可充健兵者
共五百七十餘名請五十名編一佐領共十一
佐領分充護軍領催驍騎給以月餉令操練騎

射鳥鎗等項其製備軍器馬匹銀兩照例給與
其中正黃旗原任侍衛阿喇卜坦所進蒙古人
數自足編一佐領其佐領員缺請即於其子弟
中選授許為世管佐領其餘佐領並集各處蒙
古編隸應為公中佐領於察哈爾間散官廕生
護軍校驍騎校中揀選補授其護軍校驍騎校
員缺於察哈爾前鋒護軍領催中選補至所選
兵外其餘閒丁無可依賴生計維艱應照厄魯

特佐領下閒丁例每名月給銀五錢再察哈爾
貧苦兵丁請每戶賞銀十兩每名賞布二疋其
牧場蒙古每名賞布二疋辦理軍機大臣等議
覆均如所請奏入

上從之

戊寅

命袁濟扎卜等率所領兵赴圖爾賽等臺站處駐劄撤
土默特兵五百還歸化城

上諭辦理軍機大臣等曰科爾沁台吉衮濟扎卜等帶
領扎薩克兵丁七百名駐劄昂古里地方今口外無
事令赴圖爾賽錫爾塔臺站處駐劄管束到日著圖
爾賽等於從前帶去歸化城土默特一千兵內撤五
百名令回歸化城

庚辰

命議卹北路陣亡大臣官兵等

上諭兵部曰去年六月準噶爾賊夷犯我北路弁兵奮

勇進勦遂致失利其効力之官員兵丁已降旨軍營著優加賞賚至於陣亡之大臣官員兵丁今據大將軍順承親王詳查造冊送部此陣亡人等皆荷國家歷年養育朕原欲伊等建立偉功以膺國家重賚伊等世受國恩篤思報効勇往直前以致身陷疆場雖誤入危機而致命効忠誠切可憫朕自聞報以來至今中心悽惻難釋於懷著交該部按冊詳查應加贈廕及祭葬賞卹之處照例分別詳議具奏

侍衛噶查爾圖等勦賊於鄂隆吉

命賞賚有差

護寧遠大將軍岳鍾琪奏言據駐劄魯克察克
總兵官王廷瑞報有蒙古兵納圖里等自賊營
脫歸云烏魯木齊之北奇蘭所在聚賊三萬欲
來犯阿爾台臣即遣侍衛噶查爾圖守備郎建
業等率滿洲兵五十名巴爾虎兵五十名蒙古
兵一百名綠旗兵一百名往探還言哨探賊蹤

行至鄂隆吉遇賊殺賊四人擒賊春丕勒達爾
扎等八人到營臣嚴訊擒者並供云烏魯木齊
附近積木薩處有兵三千台吉塞卜騰統之分
路遣人哨探一走塞必特已遇大兵擒勦一走
洮賚烏克克嶺等處小策零敦多卜現在奇蘭
聚兵三萬俟秋深馬肥欲往阿爾台侵犯喀爾
喀游牧那親哈什哈率兵一千往魯克察克大
策零敦多卜之子納木扎爾達什等率兵一萬

赴哈薩克部出兵臣復遣噶查爾圖等率兵趨
吳爾圖抄截賊人歸路一面飛檄總兵官王緒
級副將花天立率兵一千五百在洮賚一帶搜
山勦捕奏入得

旨侍衛噶查爾圖等遇見賊衆勦殺生擒甚屬可嘉噶
查爾圖賞銀一百兩郎建業賞銀六十兩滿漢蒙古
兵丁等賞銀一千兩分別賞賚以示獎勵

辛巳

諭順承親王等備賊事宜

上諭辦理軍機大臣等曰據岳鍾琪奏稱賊人小策零
敦多卜在奇蘭地方聚兵三萬欲侵犯喀爾喀游牧
我兵宜嚴加防備著將岳鍾琪奏摺錄寄順承親王
馬爾賽達爾濟令伊等偵探信息賊人若以全力來
犯應如何防禦若分路以輕兵來犯應如何截殺豫
行詳細定議務期妥協不可輕率

閏五月甲午

諭八旗官員人等

上諭曰昔人云和氣致祥乖氣致異此天人相感之至理古今不爽朕以此訓導天下臣民至詳且悉矣去夏今春京師亢旱地猶微動未息朕戒慎恐懼思過省愆幸邀

上天慈恩錫以霖雨不致大為災患然所以垂象示儆必有由來朕留心體察於旗人得一二事似有抑鬱不舒之氣以致上干

天怒朕不得自寬衆亦各應自省也如用兵準噶爾一節八旗將士遠役於外父母妻子愁望於家或者以爲朝廷不恤士卒有此可已而不已之舉不知準噶爾賊夷狡獪兇頑世濟其惡擾害我臣服之蒙古窺伺我西北之邊疆若不加創懲則蒙古不獲安居邊塞不能寧謐我八旗之人尚得優游燕處度外置之乎是知

皇考經理於前朕紹述於後皆出於萬不得已並非窮

兵躋武役拓地開疆而疲勞將士於沙漠窮荒之地也觀近日賊夷跳梁之狀以我朝大兵駐劄邊境而猶心懷覬覦敢肆狂逞則從前雖欲棄置不問以圖息事寧人其可得乎我滿洲八旗人等素有忠義之心勇敢之氣爾等祖父自從龍入關以及各處征討削平寇亂皆以捐軀致命為榮以老死牖下為恥今乃承平日久習於宴安因數年之征戍即生愁怨之心而忘乃祖乃父之勞績何志氣隳惰自暴自棄一

至於此乎從來急公殉難者享千古不朽之榮名而
奏凱獻功者膺國家寵褒之爵賞豈但出征弁兵當
勇往爭先即其父母妻子亦當深知大義遏抑私情
務其遠大則忠君報國之悃誠必蒙

上天垂鑒默加福祐大功可以立成凡列在戎行者均
受國家逾格之恩澤矣又如催追虧空一節聞八旗
人等亦以為苦累獨不思居官之人侵盜國帑剝蝕
民膏律以國法皆在不赦之列朕以習染既久人數

衆多不忍加戮特從寬典勒追還項以儆將來使知
侵盜橫取之物不足以長子孫庶可以止奸貪而厲
廉恥此朕之苦心實欲為人心風俗計也若云朕為
財物計而為此綜核之事獨不思十年以來朕之減
除正賦蠲免積逋與夫興修工程賑濟賞賚加惠於
官弁兵民者所費不下數千萬曾無吝惜豈有惟與
旗人較量錙銖之理哉且雍正三年以前之舊欠朕
已令該旗大臣等查奏酌免矣朕之意旨旗人既未

能悉知該管官員又不能宣布開示每於催追之時過於嚴刻甚且牽累無辜此庸劣不忠之大臣奉行不善而更隱示以奉朕意旨致令若輩心懷怨懟朕旨果如是乎夫獲罪而不知悔沐恩而不知感此皆乖戾之氣均足上干

天和用是再頒諭旨通行曉諭倘八旗人等果能遵朕訓誨洗滌肺腸共矢愛君親上之懷永絕昧理欺公之習不但朕之沛澤施恩必先自旗人始而

上天福祐善良諸事吉慶亦可預信其必然矣

乙未

命議增駐劄兵丁口糧及調遣時加賞羊價

上諭辦理軍機大臣等曰前因西路軍營兵丁行走攻
擊之時從前所定口糧不敷朕已加恩增給今思兵
丁駐劄之時亦應使之口糧寬裕以鼓勤勞其如何
酌量加增之處爾等妥議具奏尋議曰駐劄之兵與
行走坐卡之兵並十日給米一斗十日給麵十

二觔半則口糧皆可充裕奏入得

旨依議兵丁等遇有調遣行走之時每月著再加賞羊

價銀七錢

丙申

賊人來犯喀喇和卓參將劉廷琰等擊敗之

護寧遠大將軍岳鍾琪奏言據駐劄魯克察克

總兵官王廷瑞報賊人宰桑額爾克得松率兵

二千分東西兩路來犯喀喇和卓城參將劉廷

琰遊擊李英等分兵迎敵殺賊賊走劉廷琰等
率兵追勦賊人大奔遇黑霧大風不便窮追撤
兵回城臣等仍飛檄總兵王廷瑞晝夜嚴防時
加哨探奏入報

聞

戊戌

固原提督樊廷懇請前赴軍營領兵効力

許之

上諭大學士等曰固原提督樊廷來京陸見懇求前往
軍營領兵効力朕勉從其請令伊暫回固原之任李
繩武著馳驛來京面請訓旨仍回固原署理提督印
務

戊申

命吹扎卜協理喀爾喀車臣汗部落事務

上諭理藩院曰喀爾喀車臣汗策卜登拜音珠爾年幼
料理部落事務恐有遺悞著多羅郡王吹扎卜協同

辦理

己酉

命改定赴木壘駐劄兵啟行日期

護寧遠大將軍岳鍾琪奏言甘涼肅州安西兵
於五月啟行而軍營馬匹至自長途未經歇息
恐多疲瘦擬令暫收休息於六月二十間啟行
赴木壘奏入得

旨官兵移駐木壘從軍營起程吉期京中原擇六月初

四及六月二十七日今岳鍾琪奏稱馬匹應暫休養
於六月二十間啟行朕思大軍遷移駐劄之際務令
諸事從容方為有益著即定期六月二十七日起程
邊地雖早寒然七八月間建築城工地土諒不至凝
凍也

六月丁卯

命曉諭軍前喀爾喀等奮勇擊賊

護寧遠大將軍岳鍾琪奏言鄂爾多斯參領阿

玉錫自賊營脫歸云噶爾丹策零令小策零敦
多卜率兵三萬來犯北路賊兵隊中有降賊之
公巴濟達什達爾扎貝子茂海台吉策凌協理
台吉盆蘇克戴青等五人引路欲以大隊搶掠
察罕廈爾附近居住喀爾喀等直至克爾倫巴
濟并獻計與噶爾丹策零云喀爾喀等人悉懦
弱可以搶掠謹據供繕奏奏入得

旨巴濟等有負國恩實當誅戮伊並不以投順賊人為

恥反欲取信於賊妄稱喀爾喀懦弱易於搶掠殊屬可惡喀爾喀等一聞此語自必痛心切齒奮勇爭先矣著行文順承親王曉諭軍前喀爾喀等知之

戊辰

命仍給出征大臣官員等家中隨甲銀米

上諭辦理軍機大臣等曰前派往西北兩路出征之滿洲蒙古漢軍大臣官員等於起程之時朕令寬裕給與跟隨人數其家中隨甲銀米仍留為該員家口養

贍之資並未令其裁革項聞戶部於本年三月間行文各處以各員在外既有隨甲則家中不應重領銀米將各員隨甲銀米停其支領且自雍正七年大兵起程之日為始凡家中領過銀米於本人應領俸銀俸米之內照數坐扣還項該部因慎重錢糧之意並未請旨遽爾通行甚屬錯謬殊非朕體卹出征人員之本意今特頒諭旨凡軍前之大臣官員等家中已領之隨甲銀米不必扣還其應領之項照常給與並

將此旨通行各處軍營知之

辛未

命發遣人犯赴北路軍營屯種効力

上諭辦理軍機大臣等曰從前應行發遣黑龍江等處
罪犯曾改發扎克拜達里克彼時所有罪人跟隨官
兵守護城垣竭力捍禦甚屬可憫朕已加恩除其罪
名令充綠旗兵丁入伍効力續據順承親王等奏稱
伊等深知感戴朕恩共思黽勉可見有罪之人予以

自新之路仍可望其改惡從善若發往黑龍江三姓
諸處不過終身為人奴僕而已朕意嗣後將應發黑
龍江等處人犯遣往北路軍營附近可耕之地令其
開墾効力在伊身可以努力自新而於屯種亦甚有
益其如何遣發安置之處爾等詳議具奏

甲戌

靖邊大將軍順承親王錫保等奏豫防賊人來

犯事宜

錫保等奏言據自賊營脫歸之喀爾喀根都爾
什等供稱小策零敦多卜率兵會於奇蘭一自
布拉罕發兵一萬五千一自和通呼爾哈發兵
一萬五千兩路來犯阿爾台於七月間進兵臣
等詳思賊性奸狡或從一路來或分路前進未
定今於特斯路豫發精兵一萬擇水草處駐劄
外再將軍達爾濟所領兵丁尚未到伯格爾范
毓麟所運米至伯格爾者已三千餘石應加防

守臣等現令原任提督周瑛何祥書等率綠旗
兵三千赴伯格爾駐劄又調副都御史阿成阿
所領家選兵二千臣處黑龍江兵一千內扎薩
克兵一千喀爾喀兵二千同駐台西里山以三
千綠旗兵為翼駐伯格爾深溝高壘嚴排鹿角
防守糧米既可以要賊人來路且策應達爾濟
遠來之兵奏入報

聞

辛巳

命追封策勒克為輔國公令其子米什克襲爵

辦理軍機大臣等遵

旨議奏言喀爾喀扎薩克一等台吉策勒克身率四十
餘人與準噶爾賊人連戰二次奮勇殺賊以致
陣亡屬人悉被賊搶擄其子米什克亦為賊搶
去十日脫歸現在其母處

皇上軫念策勒克等實心効力特沛恩膏賞策勒克妻

銀五百兩緞十疋其屬下人等各賞銀十兩緞
一疋被傷者加賞銀五十兩順承親王已行文
扎薩克圖汗親王策旺扎卜遵

旨頒給至策勒克之一等台吉其子米什克或可蒙
恩加等承襲恭候

欽定奏入得

旨台吉策勒克奮勇陣亡可憫可嘉策勒克著追封輔
國公令伊子米什克世襲罔替伊等家產牲畜著順

承親王豐裕賞給以圖永久

秋七月丙申

護寧遠大將軍岳鍾琪奏移駐木壘事宜

岳鍾琪奏言移駐木壘官兵臣等遵

旨於六月二十七日辰時分兩路啟行臣同副將軍常

賚統兵一萬二千名由科舍圖大路直進副將

軍張廣泗同署鎮安將軍卓鼐統兵七千餘名

由鄂隆吉之北約洛圖一路前進兩路官兵約

於科舍圖會合更撥官兵四千餘名委副將譚定邦馮廷雄總理糧運護送車輛駝隻分為四運而進又委總兵岳含奇帶領湖廣官兵殿後凡應行事宜統俟師抵木壘之後次第料理奏入報

聞

丁酉

命少保大學士伯鄂爾泰督巡陝甘經略一應軍務頒

給印信

戊戌

命岳鍾琪回京以署陝西總督查郎阿署理寧遠大將
軍印務

上諭辦理軍機大臣等曰西路軍營事務岳鍾琪辦理
總不妥協著回京其寧遠大將軍印務著署陝西總
督查郎阿署理副將軍張廣泗暫行護理查郎阿年
來辦理軍務事事合宜克勝大將軍之任但肅州路

遠未便來京請訓今特命大學士鄂爾泰馳驛前往
肅州傳朕訓諭查郎阿著先期料理並賞給公用銀
一萬兩陝西總督印務及所辦軍需事著直隸總督
劉於義前往署理賞銀五千兩朕有訓諭劉於義之
處亦著大學士鄂爾泰傳旨許容范時捷俱著在肅
等候查郎阿起身時著知會提督樊廷一同出口

己亥

命大學士鄂爾泰赴肅州傳

旨署將軍傅泰等

上諭內閣曰朕命大學士鄂爾泰前赴肅州計議軍務
署將軍傅泰著即在寧夏等候西安將軍秦布侍郎
署巡撫馬爾泰著於八月內到肅等候大學士有面
傳之諭旨秦布起身時將軍印務著侍郎杭奕祿暫
行署理

敕諭吏部尚書署寧遠大將軍查郎阿

敕諭曰奉天伐罪治世之常經鋤暴除兇安邊之遠畧

逆賊噶爾丹策零狂悖冥頑父子濟惡妄欲侵凌我
屬國窺伺我邊陲包藏逆心狡焉思逞朕以此賊不
除終為衆蒙古之巨患是以命將興師聲罪致討乃
數年以來岳鍾琪調度無方制防鮮術運籌決勝並
舛機宜為將士之所輕致軍心之不振深負任使有
忝元戎茲特命爾署寧遠大將軍印務統領陝西等
處大兵一切事宜爾與副將軍常賚張廣泗酌定方
畧公同計議而行勿謂己能而不納衆論勿當事會

而猶復遲回勝算期於萬全神機定於方寸整衆須
如山嶽之重捷伐以奮雷霆之威彭勵戎行申明紀
律遠偵密探先事預防各路大兵及蒙古兵丁聽爾
調遣凡遇有警即遣發官兵應援撲勦賊中有情急
來歸者加意撫恤其不抗拒官兵者毋加殺戮凡遇
駐劄之處加謹約束兵將所過地方申明軍令毋得
騷擾百姓毋得淫人婦女毋得離散人之父子夫妻
毋得損壞人之墳墓室廬毋得強取貨物毋得驅役

平民以副朕戡亂靖逆安民綏衆之意其或有臨戰
退縮貽誤擾亂軍機者爾會同商議文官四品以下
武官三品以下即以軍法示衆官兵有犯小過者會
同商議逕行處治毋泯沒戎行之勞績毋寬縱違法
之弁兵法紀務極嚴明賞罰悉期公當一切機宜爾
商酌調遣有應知會北路靖邊大將軍者即行知會
一同辦理爾其殫乃心力敷厥謀猷克奏膚功永綏
邊徼欽哉故敕

命詳核傅爾丹等失機之罪

上諭辦理軍機大臣等曰據靖邊大將軍順承親王錫保奏稱七月十四日賊衆來侵烏遜珠爾處傅爾丹等接戰數次敗賊前隊及賊兵後隊全至盡力衝突我師失利還歸大營等語烏遜珠爾處傅爾丹領兵萬餘既已破賊前隊則後隊自應敗去如何我師遂被衝散回營用兵失機罪在不赦去歲傅爾丹冒昧進剿損傷官兵迨回科卜多時尚能整頓軍旅邀截

賊衆是以特恩寬免其罪理應竭力報効冀雪前恥
何以又致債事倘因賊衆我寡恐有疎失相機回營
尚屬可原若係輕躁懦弱以致失機即應革職嚴加
議處或官兵內有見敵先潰者即應正法示衆著大
將軍順承親王秉公詳查據實陳奏

丁未

命侍郎杭奕祿赴寧夏候

旨

上諭內閣曰侍郎杭奕祿著由西安前赴寧夏等候大學士鄂爾泰有面傳之旨其西安所辦軍需事件著內閣學士德齡協同左都御史史貽直辦理

八月乙卯

靖邊大將軍順承親王錫保奏發兵赴奔博圖
山嶺禦賊

錫保奏言目今準噶爾賊人前赴額得爾河源處臣等偵探已確酌議於奔博圖山嶺發兵堵

截共派滿洲蒙古兵一萬八千名令王丹津多
爾濟總統額駙策凌王羅卜藏喇什桑里達貝
子特古斯羅卜藏公羅卜藏參贊查克旦塔爾
岱前鋒統領塔爾瑪善副都御史阿成阿副都
統阿那布瑚習禮額爾勤烏察喇王常哲庫訥
阿思哈布爾沙貝勒僧袞扎卜公羅卜藏策卜
登沙津達賴等分派督率於七月二十一起
程奏入報

聞

庚申

命發盛京等處兵赴達里剛愛豫備調遣

上諭辦理軍機大臣等曰前經降旨令盛京等處備兵以候調遣今派盛京吉林黑龍江兵一萬其盛京兵著護軍統領扣婁副都統白爾赫圖率領吉林兵著領侍衛內大臣薩穆哈率領黑龍江兵著盛京侍郎和善內閣學士吳金率領俱於目下起程至達里剛

愛過冬以便來年青草發時各處調遣

癸亥

命撤駐劄木壘兵還巴里坤

先是西路副將軍張廣泗等奏言臣等自巴里坤起程七月十一日直抵木壘竊見木壘地處兩山之間築城其中形同釜底又兩山蔓延叢雜受敵甚易據守甚難實非屯兵進取之地按巴里坤地處平原南北兩山南山綿亘數千里

直至伊犁北山漸折而西南至科舍圖與南山鎖合實為巴里坤之關鍵再西出烏蘭烏蘇口則北山已斷南山之北即屬沙磧是以康熙五十四年間大兵屯駐巴里坤即於科舍圖派兵駐守今請於科舍圖駐劄重兵科舍圖以西之烏蘭烏蘇口南山一帶之洮賚烏克克嶺北山一帶之小科舍圖塞必特鄂隆吉察罕哈瑪爾鏡兒泉及糧運臺站經由之噶順吳爾圖哈畢

爾噶等處俱各安駐兵丁則與巴里坤大營形
勢通聯可免賊人窺伺但此事宜迅速舉行交
冬降雪則沙磧地面賊人肆意出沒萬難籌畫
矣奏入得

旨所奏甚為明晰著速即辦理並傳諭大學士鄂爾泰
署大將軍查郎阿目下撤兵之後如何防範進勦並
吐魯番回衆作何安插之處詳悉酌議辦理張廣泗
又奏言臣抵木壘之後身親閱歷見大將軍岳

鍾琪調度兵馬籌運糧餉以及統馭將士之處多屬乖方不敢不據實列奏一木壘兵丁除滿洲蒙古外其綠旗多步兵而日行站程悉五六十里至七十餘里不等路徑崎嶇身負口糧器械炎日奔走沿途困憊迨行抵木壘全無布置及探有賊騎窺覷岳鍾琪倉皇忙迫令闔營官兵沿山架梁兩三晝夜不得休息其派發兵丁旋派旋移畧無寧所一木壘城工未就駐劄營

盤關係甚重臣與副將軍常賚兩營所駐正當西北要衝乃派兵止二三百人或百餘人即岳鍾琪營盤亦僅兵丁數百人倘遇有警將何以抵禦至於部曲隊伍自有一定統束岳鍾琪每值調撥槩於各營分攤在兵丁則為雜湊在官弁則非本管且如鎮協以至千把所屬兵丁一經抽撥即應以該管官帶往餘留者竟乏統束猝遇另有調撥不得不另委將弁官與兵素不

相識徒滋紛亂一準嚙爾賊人專資馬力我兵
制敵必須馬步兼用而岳鍾琪立意用車查車
戰利在平原今自己里坤至木壘沿途溝塹崎
嶇或紆道繞過沙磧情勢總不相合至馬步兵
丁除弓箭鳥鎗外止令各帶木棍一根大刀長
戟等械全無豫備官兵莫不竊議一岳鍾琪堅
執木壘地方可以收放駝馬今經細勘並無收
放之處倒斃甚多因令綠旗兵留馬二千匹餘

悉趕赴烏蘭烏蘇科舍圖一帶牧放按烏蘭烏蘇科舍圖祇駐二千餘兵差使繁多何能分管牧馬且距木壘甚近萬一賊人窺伺勢難兩顧殊屬可虞一木壘駐兵數萬糧運最為緊要岳鍾琪初謂車行甚易加以駝運至九月可運貯十萬石不致缺誤今詢車路多亂山大嶺必須繞從沙磧正屬賊人出沒要衝難於防護兼之岳鍾琪一聞賊信不論虛實輒令停止糧車似

此遲緩轉瞬冰雪在地運送更艱數萬之衆何
所託命一岳鍾琪罔恤士卒號令不明鎮將大
員時加呵斥參遊以下日事鞭箠平時議論風
生或聞小警張皇失措性復剛愎不喜人言題
奏事件奉到

諭旨數月不宣臨事突然傳示令人莫測誠偽諸事怪
僻難以悉數臣雖力圖規正無奈置若罔聞軍
務重大不敢代為徇隱伏祈

皇上乾斷奏入報

聞至是

上諭辦理軍機大臣等曰據副將軍張廣泗等奏稱木
壘形勢四面受敵必不可駐劄大兵牧廠運道正
在可虞交冬下雪之後賊人無處不可出沒甚難籌
畫等語上年據岳鍾琪奏稱巴里坤屢被賊人侵擾
木壘形勢實為萬全之地願以全家性命保其有益
無害是以廷議允其所請今張廣泗等所奏如此則

岳鍾琪欺罔之罪擢髮難數矣目今賊人聞知木壘駐兵之信必悉力前來阻撓侵擾惟是賊衆現在盤踞北路未必更有多人分向西路我兵速乘此時撤回巴里坤乃第一要策也不必更有遲回至所稱科舍圖烏蘭烏蘇等處各分別駐兵等語伊等身在地方必有真知灼見聽其酌定就近辦理務期妥協至於吐魯番回民年來輸誠向化情甚可憫我兵既撤之後回民應如何料理或酌留官兵在彼防護或將

頭目緊要之人安插近地著張廣泗等就近商議辦理

命免故兵所領月餉并賞給本年秋季餉銀

上諭辦理軍機大臣等曰聞北路所派四省綠旗官兵數年以來有陸續在軍前病故者今年七月間該管將弁始接到部文而各兵家口從前所領月餉例應從病故之日追出歸入截曠項內朕思國家養育兵丁加恩優渥而出征身故之兵丁尤朕所格外矜憫

者其未奉文之先家口所領月餉悉著加恩免追再
今年七月間該提鎮等始接部文而所轄協營道路
遠近不齊奉文先後不等其秋季餉銀必有已經散
給者著將各兵應扣秋季之項無論已領未領一槩
賞給以示朕恩恤故兵之至意

平定準噶爾方略前編卷三十

欽定四庫全書

平定準噶爾方略前編卷三十一

雍正十年秋八月庚午

巴勒布國雅木布葉楞庫庫木三汗遣使入貢
頒敕賞賚有差

辦理藏務侍郎僧格等奏言巴勒布國雅木布
葉楞庫庫木三汗居西藏極邊萬里之外未嘗
與中國通今慕

皇帝至德遣使入貢方物辭意誠懇請令來使至京朝見辦理軍機大臣等議曰天寒道遠使臣往返計二年程應令價格等宣布

皇上惠恤遠人之意轉諭來使令其旋歸並加賞賚給與馬匹更換俾得從容啟行奏入

上從之

敕諭巴勒布國雅木布葉楞庫庫木三汗曰據爾等奏稱從前不知內地禮儀未遂觀光之志今遣使朝覲

恭請訓諭進貢之物不多略盡恭敬之忱等語朕為
天下主一視同仁爾等汗越在邊遠自古未通華夏
慕朕仁化萬里輸誠朕甚嘉悅所進方物悉已收納
第念道路遙遠往返艱難爾使臣即由西藏遣回爾
等汗但與西藏貝勒頗羅鼐協力和衷維持黃教以
副朕普育羣生之至意特賜緞疋玻璃磁器各種一
併發往

癸酉

北路副將軍王丹津多爾濟額駙策凌等大敗賊人於額爾得尼招

上命大學士鄂爾泰等於西路阿濟一帶發兵截之

丹津多爾濟策凌奏言臣等奉大將軍王錫保派調令率滿洲蒙古索倫喀爾喀等兵二萬追擊準噶爾逆賊八月初五日臣等至額爾得尼招見賊兵與賊戰十餘遇賊且戰且却日暮抵大山梁一面偪水戰益酣殺賊萬餘尸滿山谷

河流盡赤餘賊悉負傷大奔所獲器械駝馬牛羊無算現在賊沿鄂爾昆上游向推河而逃臣等身率大兵即日自額爾得尼招發尋賊敗蹤跡窮追進勦奏入

上諭辦理軍機大臣等曰據王丹津多爾濟等報稱八月初五日在額爾得尼招地方我兵與賊人交戰賊衆大敗由鄂爾昆之上游向推河逃遁而去等語可將原摺錄寄大學士鄂爾泰署大將軍查郎阿知之

賊人既由西爾哈淖爾投阿爾台而去若遇雪阻截必向阿濟一帶潛行向巴里坤以覓生路大學士鄂爾泰等速將北路得勝情由寄知巴里坤軍營令其於阿濟要隘之處派兵堵截毋得疎忽再者木壘大兵撤回之時賊人或於中途窺伺或潛襲我軍之後務須加意防範至於巴里坤乃根本之地亦須計算萬全俱著大學士鄂爾泰等就近妥協籌畫

參贊內大臣侯馬蘭泰奏報敗賊於西爾哈招

馬蘭奏言八月初九日賊兵二千來犯西爾
哈招臣親選兵一千與副都統費雅思哈土默
特總管珠瑚岱喀爾喀協理台吉遜都卜率之
出城迎擊賊兵大敗斬賊百餘所獲器械無算
次日追至那壘郭勒賊乘夜遁走即檄知綏遠
將軍馬爾賽並報大將軍順承親王訖奏入報

聞

乙亥

命革副將軍劉世明職効力贖罪

上諭辦理軍機大臣等曰劉世明由侍衛之職朕加恩用至總兵提督伊在提鎮任內居官尚好是以用為福建巡撫陞授總督上年西路領兵需人朕念伊熟悉邊地情形特召來京命為副將軍授以巴里坤領兵之重任料伊受朕深恩必思黽勉宣力為將弁之表率豈知伊苟且瞻顧退縮不前全無奮勵振興之氣既忝職任重負國思著革職交與署大將軍查郎

阿照總兵或副將之例於領兵艱苦之處令其効力
贖罪倘再有錯誤疎忽即行參奏在軍前正法

戊寅

靖邊大將軍順承親王錫保奏發兵追擊賊人
錫保奏言副將軍王丹津多爾濟額駙策凌等
追賊至額爾得尼招奮勇殺賊萬餘除檄綏遠
將軍馬爾賽建勲將軍達爾濟各率兵截殺外
臣選兵三千令扎薩克台吉根丕勒前鋒參領

達度等率師合擊即日啟行奏入報

聞

九月乙酉朔

命加思議叙額爾得尼招破賊功

上諭辦理軍機大臣等曰此次準噶爾逆賊志欲搶奪
哲卜尊丹巴胡土克圖侵掠喀爾喀部落直越察罕
廋爾大營由杭愛山肆行猖獗王丹津多爾濟額駙
策凌參贊大臣塔爾岱及諸王大臣台吉等共領滿

洲蒙古喀爾喀等兵二萬奮勇尾追千里到鄂爾昆
河額爾得尼招地方諸王大臣及台吉官兵等同心
協力為國輸誠奮勇攻擊將三萬逆賊斬殺大半餘
賊喪膽奔逃甚屬可嘉此次軍功非尋常勞績可比
官員兵丁著從優議敘其隨從額駙策凌在克爾森
齊老地方擊賊官兵著加倍議敘領兵効力之王貝
勒貝子公扎薩克台吉等應賞巴圖魯名號陞授職
銜今於議敘軍功之先特沛恩綸喀爾喀和碩親王

丹津多爾濟著賞給智勇名號喀爾喀和碩親王額駙策凌著賞給超勇名號喀爾喀多羅貝勒策卜登從前在阿爾台軍前著有勞績去年在蘇克阿勒達呼地方攻擊準噶爾又懋著勤勞朕已賞給信勇名號此次在額爾得尼招大敗準噶爾賊衆又復追擊効力前驅策卜登著封為多羅郡王扎賴特固山貝子特古斯從前在阿爾台軍前曾効力行走此次在克爾森齊老擊賊甚力在額爾得尼招又復大敗賊

衆建立功勳特古斯著封為多羅貝勒敎漢輔國公
羅卜藏隨從額駙策凌在克爾森齊老擊賊又在額
爾得尼招大敗賊衆又與貝勒策卜登塔爾岱等追
擊賊衆効力前驅羅卜藏著封為固山貝子喀爾喀
扎薩克一等台吉巴海從前在阿爾台軍前曾効力
行走去年亦著有勞績此次在額爾得尼招大殺賊
衆建立功勳喀爾喀扎薩克一等台吉根丕勒去年
懋著勞績此次在克爾森齊老額駙策凌隊內力戰

得傷回至察罕廋爾軍營調治痊好復行前往追擊賊人巴海根丕勒俱著封為輔國公塔爾岱著授為黑龍江將軍統領軍營東三省兵丁淖爾海著授為內大臣署理黑龍江將軍事務其餘扎薩克喀爾喀王貝勒貝子公台吉內若有似此勞績出衆之人而遺漏者著大將軍順承親王王丹津多爾濟額駙策凌查明具奏

命革馬爾賽職以欽拜暫署綏遠將軍

上諭辦理軍機大臣等曰朕念馬爾賽之祖圖海功績
令其配享

聖祖皇考於

太廟馬爾賽所襲之三等公爵加為一等擢用為大學
士復賞輕車都尉令伊子承襲施恩稠疊衆所共知
朕以為馬爾賽必感戴殊恩實心為國効力因授為
大將軍遣往軍前乃伊未至歸化城先將馬匹牲畜
傷損數千在口外第八臺處聞科卜多地方準噶爾

賊衆消息便自怯懦奏請往歸化城又將馬匹牲畜
不擇好水草之處牧放折損大半且不禁約兵丁縱
其貪饕飲食肆意糜費以致變賣衣服如此乖謬妄
為之罪朕猶寬恕與以効力贖罪之途授為將軍令
往扎克拜達里克而馬爾賽沿途又不調養駝隻倒
斃數千然朕猶優容之望其効力也頃準噶爾賊衆
來犯察罕廋爾之大營直越杭愛搶奪喀爾喀等部
落王丹津多爾濟策凌參贊塔爾岱等率領大兵尾

追至鄂爾昆之額爾得尼招地方大敗賊衆殲其大半賊拋棄馬畜及一切器械膽裂奔敗大將軍順承親王已劄令馬爾賽會同達爾濟截殺王丹津多爾濟等亦以賊衆大敗投往推河行文於馬爾賽且馬爾賽接閱順承親王等劄後奏稱賊若來推河必緣伊克鄂拉而適今已將伊克鄂拉左近之草焚燒等語如此則馬爾賽自應如前所奏率兵前往推河預備截殺乃賊衆既至推河而馬爾賽猶逗留扎克拜

達里克至十三日始出城為追趕之狀行二三日聞有賊兵將往伯格爾之語即藉端而回夫以徒手敗走之賊不行追逐知而放去又不奏明達爾濟領兵往追情由朕以馬爾賽必有怯懦逗留明知故誤等情曾降諭旨於大臣等今據參贊胡琳參稱一聞賊來推河信息將軍達爾濟等即整齊二標兵丁前往截殺賊衆而馬爾賽並不發兵傳鼐請兵殺賊至於跪求伊亦決不允許至十三日因臣等標下兵起程

馬爾賽不得已同行至半路而回等語馬爾賽擁兵
萬餘有心耽誤國事豈但大負朕之深思自古以來
如此背負國家者史策中亦為罕覲國法軍法俱難
寬宥著將馬爾賽之綏遠將軍領侍衛內大臣公以
及賞給輕車都尉俱行革退其將軍印務著欽拜暫
行署理領侍衛內大臣員缺著侯馬蘭泰補授其公
爵係伊祖圖海立功所得著馬禮善承襲今已行文
令馬爾賽明白具奏俟回奏時將馬爾賽正法之處

另降諭旨

命授軍營參贊正紅旗蒙古副都統胡琳為鑲藍旗護
軍統領給喀爾喀王斂珠爾多爾濟旗分協理
台吉遜都卜扎薩克一等台吉職銜賞銀五百
兩給副都統費雅思哈護軍統領職銜

命賞給額駙策凌等屬人被掠者

上諭辦理軍機大臣等曰此次準噶爾賊人前來時額
駙策凌屬下及喀爾喀扎薩克袞布策凌游牧等處

俱被擄掠著順承親王查明照舊歲賞給被搶喀爾喀產業之例一面辦理一面奏聞

命治喀爾喀汗王以下臨戰退縮者罪

上諭辦理軍機大臣等曰喀爾喀扎薩克圖汗策旺扎卜親王喇嘛扎卜公扎薩克等畏懼退縮俱由陣前逃回游牧目今行兵之際軍法豈可姑容著行文順承親王王丹津多爾濟額駙策凌將陣前逃回之汗王以下台吉暨領兵之副都統等查明嚴加治罪

命曉諭西路軍營將弁兵丁等

上諭曰噶爾丹策零父子兇頑世濟其惡戕害臣服我朝之蒙古部落窺伺我邊疆國家不得已用兵之苦心已屢經曉諭官弁兵丁等知之矣夫三軍司命在於將帥朕慎重其選以岳鍾琪乃將門之子久歷行間從前用兵青海曾有勞績且於西陲情形素為熟練伊亦自信克當此任是以命為西路大將軍一切徵兵運餉選將設官之事凡有所請無不允行實冀

其殫心竭力奏績邊疆為一勞永逸之計豈料伊秉性粗疎辦事濶略平居志大言大似有成算及至臨時則張皇失措意見遊移且賞罰不公號令不一不恤士卒不納善言自奉太豐待下鮮惠今畧舉其失機一二事言之前年冬月陞見入都軍營之事全無料理以致賊人盜竊駝馬傷我弁兵嗣後朕時時降旨諭令慎密周防乃今年正月賊人越過大營直至哈密及塔勒納沁等處搶掠牲畜戕害回民伊將令

不行調度無術竟令已入網羅之寇賊由坦道遁逸而去又如木壘駐兵之舉實由岳鍾琪之奏請且稱願以全家性命保其萬全乃我兵移駐之始即任賊人潛過木壘河東搶擄馬匹傷害官兵現今運道牧廠時受侵擾此皆岳鍾琪失算誤國之昭著者其他顛倒昏憤疎忽錯謬之處不可枚舉以統兵之人居心行事如此無怪乎三軍之士離心解體兵氣為之不振也朕思用兵之事關係重大似此一籌莫展屢

失機宜則軍務何日能竣我三軍之士何時得以休息用是特降諭旨將岳鍾琪調回京師以吏部尚書陝西總督查郎阿署理大將軍事務命大學士鄂爾泰親至肅州頒賜敕書指授方畧查郎阿素性忠良赤心為國虛懷謙受能體下情自辦理軍需以來事妥協邊疆情形皆所深知一到軍營與副將軍張廣泗常賚等合志同心和衷共濟必能運籌決勝靖寇安邊是在爾將弁兵丁等鼓舞奮興急公努力盡

洗從前萎靡怠惰之習合千萬之人為一心則忠誠感格和氣致祥必邀

上天之默佑迅速成功膺國家優隆之爵賞是此日之更換將帥酌改規模實爾西路軍營通塞否泰轉移之機也今年七八月間賊兵以三萬人侵犯北路深入額爾得尼招地方意欲迎擊喇嘛擄掠喀爾喀蒙古我師奮勇前追殺死賊兵萬人積屍如山河水盡赤賊夷乘夜逃奔拋遺馬匹牛羊器械不計其數而

我兵受傷者不過十餘名領兵之大小將弁未損一員此實行間將士合力同心仰邀

天佑之明驗也今賊人既受大創於北路未必不輕視西路重整餘力以向巴里坤冬春防範尤宜嚴密不可疎忽著大將軍等將此曉諭各營將弁兵丁咸使知悉至岳鍾琪屢次失機之罪甚大律以國法不容寬貸又聞軍營弁兵無不含怨著大將軍查郎阿徧行詢問軍營將弁兵丁等岳鍾琪自領兵以來果屬

事事乖張人心共怨否抑或尚有可取之處否務使
三軍之衆人人各抒己見據實舉出即有互異不妨
兩奏以聞

癸巳

命革博爾屯職以閒散公在軍前効力

上諭辦理軍機大臣等曰朕念博爾屯之祖舊日勞績
將博爾屯屢加任用伊並不黽勉向前因命往扎克
拜達里克馬爾賽軍前効力乃王丹津多爾濟等在

額爾得尼招大殲賊衆之後所有疲困奔逃之賊前
至扎克拜達里克伊有精兵萬餘並不邀擊懦怯觀
望俾其遁去博爾屯如曾勸馬爾賽而不允其罪尚
輕如並未經勸過則伊之首領亦難保矣一切情節
著據實回奏其參贊大臣內大臣都統俱著革去以
間散公在軍前効力行走

乙未

訓勵青海王貝勒貝子等

上諭青海王貝勒貝子等曰今年七月間準噶爾策零
敦多卜帶領三萬賊衆侵擾內地被喀爾喀副將軍
王丹津多爾濟等帶領滿洲等兵二萬將賊兵截殺
幾盡喀爾喀等既能如此奮勇殺賊爾等何獨不能
乎各宜鼓舞振興踴躍効命賊兵前來侵擾青海祇
有噶斯一路爾等須在緊要隘口預備看守倘有賊
兵前來務期協力追殺悉行勦除將此曉諭爾等部
落知之

命以大學士伯鄂爾泰奏摺示達爾濟等

大學士伯督巡陝甘經畧軍務鄂爾泰奏言逆賊於八月初五日在北路額爾得尼招為我兵所破自鄂爾昆河源向推河適接逆賊敗走必經必濟一帶中間有袁塔瑪哈戈壁乃必濟要隘去巴里坤不過三百餘里臣即於八月二十一日檄署寧遠大將軍張廣泗令選滿洲察哈爾精兵二千以前鋒統領阿思海領之佐以副

都統達什選綠旗精兵一千以總兵官張存孝
領之佐以副將馮廷雄即日赴哀塔瑪哈堵截
並令阿思海等一到哀塔瑪哈即遣弁兵哨探
必濟一帶如有賊蹤飛報張廣泗率兵追剿又
令張廣泗備兵數千遣發繼進以壯聲援奏入
得

旨鄂爾泰身在肅州一聞信息即遣兵丁截殺賊衆斯
可謂為國之大臣達爾濟諾爾琿欽拜等擁兵萬餘

駐劄扎克拜達里克遇準噶爾窮寇徒手奔逃並不
迎擊待其已過虛作追趕之勢怯懦不堪將此寄與
伊等知之

丁酉

訓勉喀爾喀七旗王貝勒貝子公台吉屬下人等

上諭曰去年朕降旨令爾等移居內地爾等並不感悅
遵行朕又屢次催促始勉強遷移此次準噶爾賊兵
前來幸王丹津多爾濟等帶領大兵將賊兵殺敗爾

等始得脫免否則爾等部落豈能保護產業牲畜朕思爾衆喀爾喀本屬一體豈有甘居庸懦受人庇護之理嗣後各宜激烈奮發將賊兵悉行勦滅不特永享昇平抑且垂光史冊矣勉之

庚子

護寧遠大將軍印務張廣泗奏請撤兵駐巴里坤并籌吐魯番駐兵運糧事宜

張廣泗奏言臣前奏木壘駐兵不便請移兵駐

科舍圖今臣與署鎮安將軍卓鼐參贊顧魯暨
在營鎮將等密議於八月二十八日自木壘起
程三十日抵科舍圖但周閱科舍圖所在路徑
叢雜氣候苦寒且現今築城未畢四面草廠悉
為賊人所燒亦難久駐臣等不敢固執前議請
盡撤大兵至巴里坤於附近要害處設兵駐守
按洮賚烏克克嶺二處為賊南走徑路各置兵
一千五百度集察罕哈瑪爾二處為賊人西來

大道各置兵一千又鏡兒泉噶順及烏卜圖克勒特克三處並在巴里坤北賊人或由沙磧或由北山來道悉可通應於鏡兒泉置兵二千噶順置兵五百烏卜圖克勒特克置兵一千又圖古里克圖爾庫勒二處在巴里坤東北賊人自阿濟必濟越沙磧而來此為孔道應各置兵一千更於一切要隘分設小卡倫撥兵遠哨巡護牧廠哈密塔勒納沁二處亦並增兵防守再木

壘大兵既撤則吐魯番孤懸一隅駐兵運糧所
當籌畫吐魯番駐兵原有八千其現留押運糧
糈兵丁五百名並分駐魯克察克喀喇和卓闐
展洋赫勒木津塞木津漢墩七處按勒木津塞
木津漢墩所在逼近賊人聲勢不相聯絡請悉
撤三處官兵併入魯克察克喀喇和卓闐展洋
赫四處分駐並三處回民亦令移居魯克察克
等城中庶免賊人窺伺之心而我兵亦易於防

範矣奏入報

聞

辛丑

黜喀爾喀扎薩克圖汗副將軍策旺扎卜爵

命以其族弟多羅郡王格勒克雅木丕勒承襲

壬寅

命賞卹喀爾喀貝勒車木楚克納木扎爾

上諭辦理軍機大臣等曰喀爾喀貝勒車木楚克納木

扎爾帶伊屬下兵丁前往軍營因途中病足令伊弟
與子將兵前往伊自回部猝遇塞卜騰旺布屬下奇
爾吉斯等背叛伊率屬下人拒戰身受鎗傷而亡其
屬下兵丁奮擊奇爾吉斯等悉行斬殺甚屬可嘉著
順承親王查明有已故受傷者議敘恩賞車木楚克
納木扎爾受傷身故朕心軫念著派侍衛部屬各一
員前往祭奠賞銀一千兩

戊申

大學士伯經畧鄂爾泰條奏邊地屯田事宜

鄂爾泰奏言邊地屯田事宜一總理屯務副都

御史孔毓璞請頒給關防以昭信守一客民首

報地畝應分別給與工價每籽種一石上等地

給銀二兩中等一兩五錢下等一兩二錢其夫

役人等除每月給與工價口糧外每年再加賞

銀一兩皮衣皮帽銀二兩至所委監種人員暨

跟役每日給銀六錢庶食用有資而驅遣無誤

一屯田所需夫役俱在甘涼肅一帶僱募令各
地方官出具保結以免逃逸其口內口外沿途
往返給與口糧並築一土堡酌量夫役可以容
居牛畜等即圈飼於此一屯田所在一切僱募
夫役增補農具及給散工價收穫禾稼諸務並
令所在有司協同辦理庶免遲延偷竊等弊一
各項動用銀兩應令總理屯務大臣奏報在軍
需銀內動支另行報銷奏入

上從之

己酉

命革傅爾丹職其振武將軍印信貯軍營

上諭辦理軍機大臣等曰據順承親王錫保奏稱傅爾丹在烏遜珠勒地方並不整備官兵預籌堵禦之策輒輕調官兵進擊以致有誤軍機傅爾丹著革去公爵及領侍衛內大臣振武將軍又

諭曰北路軍營現有大將軍印信其振武將軍印信著

收貯若有調遣之處請旨派人掌管

護寧遠大將軍印務張廣泗奏撤兵至巴里坤

事宜

張廣泗奏言臣等於八月二十八日自木壘撤
兵令太原總兵官王緒級等率兵四千五百餘
由南路赴洮賚烏克克嶺廋集等處駐劄松潘
總兵官張元佐等率兵四千餘由北路赴鏡兒
泉噶順察罕哈瑪爾等處駐劄臣與副將軍常

賚署鎮安將軍卓鼐等率兵六千餘由中路行
過噶順溝即以大兵畀常賚等統轄臣輕騎兼
程於初八日已抵巴里坤辦理一切機宜初十
日常賚等亦抵巴里坤駐劄其官兵分南北兩
路行者悉於初十日前各抵駐劄所在沿途慎
重防範並無賊人窺伺奏入報

聞

庚戌

大學士伯經畧鄂爾泰奏請鑿山引水開九家
窑屯田

鄂爾泰奏言邊地屯田最要按肅州城南九家
窑有荒地一區土高無水不能播種九家窑之
北上寨中寨水堡上鹽池等四堡並熟田亦以
水源不足兼有漏沙每歲不過薄收請於上流
鑿山開洞引千人壩之水逆流而上以避漏沙
則九家窑荒地可墾且餘水下注則上寨等四

堡熟地更可倍收於民生軍儲並有裨益奏入
上從之

癸丑

命議築察罕廈爾城

上諭辦理軍機大臣等曰察罕廈爾城甚小止可屯積
米石是以順承親王又修木城朕意欲照扎克拜達
里克城開展濶大著行文順承親王明歲動支錢糧
修築或令彼處兵丁或由京師遣工匠前去著順承

親王一併議奏



平定準噶爾方略前編卷三十一

欽定四庫全書

史部

平定進嚮爾方略前編卷三十五

二至

詳校官監察御史臣孫家賢

通政使司副使臣莫瞻菴覆勘

總校官進士臣朱 餘

校對官中書臣李斯咏

騰錄監生臣李亭植

欽定四庫全書

平定準噶爾方略前編卷三十二

雍正十年冬十月丙辰

命順承親王錫保等預備勦賊事宜

上諭辦理軍機大臣等曰蒙

天眷佑我國家大軍在額爾根尼招地方大敗賊人追

奔逐北凡我將士不可因此懈弛當仍如未敗賊時

一切備禦防範尤加嚴固朕意今年賊雖敗北明年

或悉其衆力越阿爾台山分為數路每隊一二千人
隨便潛來侵襲卡倫牧場擾亂喀爾喀人等得隙則
進不可則回均未可定賊計若出此則我察罕度爾
柏格爾地方之兵難於四出應援著行文順承親王
與丹津多爾濟額駙策凌等將喀爾喀游牧移於僻
遠堅固之處令賊斷不能到大兵分為數隊如何勦
殺如何衝突令賊無隙可乘預行詳計妥辦毋忽

戊午

命訓飭順承親王錫保

上諭辦理軍機大臣等曰今年賊衆來侵之時順承親王雖屢行文馬爾賽達爾濟等令相機而行並未示以如何截殺如何堵禦王身為大將軍馬爾賽等所屬之將喀爾喀地方及賊人所行路徑王所素悉乃不為先期指授殊屬疎忽且馬爾賽失悞軍機坐視殘寇兔脫王即應嚴加劾治直待朕降旨將馬爾賽等問始行參奏甚屬優柔觀望著行文訓飭

辛酉

命額爾得尼招破賊有功索倫等一體議叙獎賞

上諭辦理軍機大臣等曰聞得此次在額爾得尼招敗賊時索倫等勞績懋著從前曾降諭旨額爾得尼招大敗賊人之官兵內有在烏遜珠勒處戰敗者功罪相當不必議叙爾等可行知順承親王額爾得尼招戰勝之索倫內有在烏遜珠勒行間行走者仍照常議功獎賞

癸亥

以額爾得尼招破賊功

命加恩王丹津多爾濟封其子多爾濟塞卜騰為世子
並晉封貝子羅卜藏等

上諭辦理軍機大臣等曰喀爾喀副將軍王丹津多爾
濟自用兵以來實心効力去歲奮勇追殺準噶爾賊
人今又在額爾得尼招統領滿洲蒙古喀爾喀兵丁
大敗賊衆斬馘萬餘挫其鋒銳賊人喪膽望風逃遁

自是軍威遠震疆圉寧謐喀爾喀扎薩克等可共享
太平之福如此建立大功雖賜伊墨爾根巴圖魯之
號朕心猶為未足向來外藩蒙古王等之子並無晉
封世子之例朕念丹津多爾濟勞績昭著用加特恩
著照宗室王等之例將伊長子多爾濟塞卜騰封為
世子再翁牛特貝子羅卜藏喀爾喀扎薩克台吉齊
旺俱在額爾得尼招奮勇殺賊貝子羅卜藏著晉封
為貝勒扎薩克台吉齊旺著晉封為輔國公

命以振武將軍叅贊都統查克旦為靖邊大將軍叅贊

甲子

命治馬爾賽及李杖罪

上諭內閣曰馬爾賽本屬庸材我

皇考聖祖仁皇帝念伊祖大學士圖海舊日功勳望其
子孫成立將馬爾賽少年襲封公爵訓誨成全優加
擢用乃伊不能仰承

聖恩致遭罷黜旋經一載我

皇考不忍令其廢棄仍命襲封且加以格外之恩榮身
兼數職無非勉勵玉成以繼名臣之後也及朕御極
之初仰體

皇考優待勲臣之盛心首先及於海圖晉封一等公配
享

太廟兼立專祠永承禋祀又推恩及於馬爾賽念其家
世不同歷官年久加恩優待賞賚便蕃此舉朝所共
知者雍正五年大學士富寧安奉差陝西滿洲之在

內閣者僅有馬齊一人又因年老不能辦事而滿洲之官階資格可用為大學士者復不得其人是以前馬爾賽備員政府以為班聯領袖其實未能贊襄一事敷奏一言稍有補於政治之萬一此亦舉朝所共知者朕初即位時命伊兼管鑲藍旗都統伊以不能辦事力辭朕亦曲從其請蓋其苟且偷安不能出力之心朕早已知之至於伊歷來貪贓不法之案漸次敗露者朕皆暗中為之消弭其應追之贓銀數萬兩

又復降旨悉行寬免更賞世職以逮其子孫賜帑金以固其操守凡所以恩待之者遠出諸臣之上以為馬爾賽苟有人心必無有不知感恩圖報之理去年六月間傅爾丹統領北路大兵駐劄科卜多悞被賊人所誘貪功輕進至於敗北得順承親王調度運籌重加整理軍聲復振朕因傅爾丹既已失機不可再膺元戎之寄順承親王久勞於外既有保障之功應令暫解軍務回京休息於是將馬爾賽授為北路大

將軍畀以討賊防邊之重任伊在京承命之時即有
退縮怨望之意及領兵行走並不教訓兵丁愛惜馬
力未到歸化城而馬匹已陸續倒斃於道矣行至第
八臺聞賊人有侵擾科卜多信息即逡巡畏懼奏請
退回駐劄相機前進乃至歸化城時又不於水草好
處牧放馬匹日事遷延以致兵丁之馬損傷大半其
意以為馬力不敷便可藉口推托以遂其退避之奸
志也伊在京面奏朕云為將之道必須與士卒同甘

苦乃伊到歸化城即伐木取材蓋造煖室全忘士卒
之露處竟欲久居於此為娛老之計者且心懷怨望
於衆大臣齊集之前口稱領兵為大將軍不如發遣
黑龍江反為安逸其但知有己而不念國家悖逆庸
愚一至於此朕知其不可以為大將改授為綏遠將
軍令其領兵赴扎克拜達里克駐劄以為堵禦邀截
之計今年七八月間賊人侵犯察罕度爾輒敢越過
杭愛深入我境搶掠喀爾喀地方是時大將軍順承

親王派委副將軍蒙古王丹津多爾濟額駙策凌叅
贊大臣塔爾岱等率領官兵尾隨賊人之後於八月
初四日追至額爾得尼招地方與賊人相遇鏖戰一
日自黎明至於昏黑賊衆大敗殺賊萬餘積屍遍野
河流盡赤賊人魂膽俱喪拋棄馬畜器械乘夜逃遁
此次對壘仰荷

上天恩佑我軍大小官員只損二人兵丁被傷者不過
數十乃從來罕聞之盛事大將軍順承親王及蒙古

王丹津多爾濟等即將賊兵大敗情形並由推河潛逃之信馳報馬爾賽等令其發兵堵賊歸路軍營將士無不踴躍奮往有滅此朝食之心而馬爾賽立意坐視按兵不舉同事之大臣等再三約會陳說馬爾賽堅執不從傅鼐以機不可失情急至於跪求而馬爾賽始終不允且向達爾濟等差來之人云我兵不令出城夜間賊人來時我兵只在城上吶喊助威爾等兵丁若昏夜來我城下我即施放鎗礮等語似此

悖逆之言聞者莫不駭異及聞賊人既已潛逃達爾
濟等又復約會進勦而馬爾賽遷延不行直至次日
方領兵緩行五十餘里虛作尾追之狀又越二日行
數十里託言賊已遠去追趕不及遂領兵回營此胡
琳身在軍前目睹情形具摺陳奏者朕又降旨詢問
軍營叅贊欽拜等據欽拜博爾屯諾爾琿回奏賊人
由推河等處逃遁馬蘭泰兵力單弱博爾屯願領兵
前往應援馬爾賽不允嗣議截殺賊人之事諾爾琿

向馬爾賽云我等應即派兵迎截若再遲延倘賊人全過便坐失機宜是時李杅云我等惟當固守城池而已馬爾賽惟以李杅之言為是不聽諾爾琿等之言及至佐領扎木素告稱我向扎克拜達里克來時見沿途賊人陸續經過等語馬爾賽正傳集會議間而李杅又向馬爾賽堅執守城之說諾爾琿等又再四告稱如後面尚有賊人此番經過之時決無燒荒之理視此燒荒情形即係後面確無餘賊之明証我

等急當追勦斷不可失此機會馬爾賽方領兵起程
及到博木喀喇地方僅選兵七百名令欽拜前進馬
爾賽竟回至扎克拜達里克等語此欽拜博爾屯諾
爾琿回奏之大槩也朕又降旨詢問馬爾賽馬爾賽
回奏之摺一味支吾強為推卸馬爾賽縱賊之罪百
喙其能辭乎況欽拜等尚皆惶懼認罪而馬爾賽猶
復醜顏巧辯無一媿赧之辭冀售欺於萬一則其蓄
心狡獪奸險更可知矣此次賊人大敗之後狼狽不

堪馬爾賽擁兵萬餘不必出奇制勝但肯遵循常理堵截賊之去路實可使之一騎不返即或有逃奔餘黨而我師以大隊追襲其後必不使殘敗之寇得以漏網生還實乃奏凱成功易於完結軍務之機會也馬爾賽身任統兵之職地當扼要之區賊過不行堵截賊去又不尾追端坐空城視同秦越衆人苦勸之言堅執不聽竟令入網之獸復得免脫將來餘孽跳梁一時未能翦滅伊誰之咎似此有意阻撓軍機紊

亂國事並非尋常失機之比馬爾賽不思國家高厚之恩不念伊祖積累之舊在國為叛臣在家為逆子不忠不孝莫此為甚若馬爾賽此番情罪或為人臣所間有尚可念其先世之勲曲加寬貸而馬爾賽縱寇之罪豈可貸乎且伊之負恩如此朕撫躬自思加厚恩而招怨望朕實無以自解亦實有所不甘此皆朕乏識人之明悞用匪人朕先謝罪

宗社臣民將馬爾賽正法以為人臣受恩深重而心懷

悖逆者之戒著詢問在京滿漢大臣九卿及北路軍營扎克拜達里克軍營將弁等令據實即行回奏大凡微員庶民治罪之案皆屢經審訊而後定豈有馬爾賽為國家大臣不加審訊而遽行治罪之理馬爾賽之心之罪朕知之甚悉見之甚確實無幾微可疑昔年

皇考對朕兄弟輩曾數次面諭圖海乃我朝第一良臣將來應配享

太廟

皇考厚待圖海之恩誼朕無時敢忘今將馬爾賽治罪之時愈益思念及此伊既忍悖我

皇考逆伊祖父朕執大法以理天下而於不忠不孝之人姑息寬宥遲迴不決實無以對我

皇考亦負伊祖圖海之忠心矣至於李林世受國恩不思報効居心妄誕行事乖張前在廣東將軍任內縱令所屬兵丁擁鬧巡撫公堂鎗傷守備大千法紀經

三法司議將李杖擬斬監候雍正六年朝審九卿擬以情實具題原應不赦朕念其為勲臣之裔免死釋放旋又降旨將伊補授都統仍襲伯爵此朕宥過錄用莫大之恩也去年北路派出漢軍兵丁揀選領兵大員朕因李杖為漢軍世族管兵多年諸事尚屬素諳特旨將伊派往料其感恩悔過必能黽勉自新豈知伊中懷叵測於軍機緊要之時一言僨事其罪與馬爾賽等著一併詢問具奏

乙丑

命議安插新附回民事宜

上諭辦理軍機大臣等曰吐魯番回民遷移近邊一事據副將軍張廣泗等計議明晰伊等身在軍營自有確見但不知此際有無賊人阻滯所議遷移之事曾否舉行若果於冬月遷移則天氣寒冷深可軫念雖張廣泗奏稱塔勒納沁向有城堡儘可令回民暫住俾其耕種朕思此地並無房屋回民何以棲身查哈

密地方和暖其城外五堡等處原係哈密回人居住之所若將移來之回民分派此地暫行安插過冬令額敏轉飭本地回民就近照看似為有益若哈密回民果能同心照看使之得所朕必將額敏及回民等加以重賞至於吐魯番新來之回民著查郎阿等重加賞賜派委幹員加意撫綏諸凡寬裕料理務使伊等不知有遷移之苦將來若令其在塔勒納沁居住可早為辦理物料以便及時興造房屋俾獲寧居爾

等可將此寄信前去並令劉於義等知之倘冬月不
即遷移可遲至春間再議舉行

丁卯

議喇嘛蒙古等編設佐領事宜

辦理軍機大臣遵

旨議奏言張家口外所任察罕喇嘛等其徒計百七十
丁合之蒙古部人歲饑來投者及副都統瞻岱
等所進新平口外蒙古凡六百有五丁請以五

百丁編置三佐領給額駙策凌管理餘百丁以
七十丁給喀爾喀公米什克三十丁給一等台
吉丹津並按戶給予牲畜資其生計奏入

上從之

戊辰

命治貝勒達什喇卜坦等私換兵丁之罪並傳諭訓勵
撫輯喀爾喀等部人

上諭辦理軍機大臣等曰據將軍達爾濟奏稱撥派鄂

爾多斯之兵三千名原屬精壯乃協理台吉策旺多爾濟與貝勒達什喇卜坦諾衣羅卜扎木蘇將兵丁私行更換三千兵內五百餘名不堪調用又逃亡四百餘名等語朕不惜國帑數千萬億極邊遠塞駐劄兵丁特欲保全喀爾喀內扎薩克之故也伊等理應各自奮勉勦殺賊人乃私換兵丁肆意逃遁此係扎薩克等從來未有之事今派侍郎納延泰選補缺額之兵將逃回官兵嚴加治罪為首逃遁者即著正法

貝勒達什喇卜坦諾衣羅卜扎木蘇協理台吉策旺
多爾濟長史護衛等俱著嚴加治罪其不堪調用之
兵五百名著回原游牧處所夫懲罪勸功乃國家之
大典今歲八月副將軍王丹津多爾濟額駙策凌等
於額爾得尼招地方大敗賊衆喀爾喀王台吉等俱
已賞給巴圖魯之號備得封典陞銜恩及子孫又動
庫帑二百萬兩分賞官兵給與功牌去歲喀爾喀西
邊扎薩克圖汗部落數扎薩克被賊搶擄陣亡受傷

人等朕俱施恩重賞其與賊交戰已故之一等台吉策勒克已贈為公爵令伊子米什克襲替至於奴僕房產衣裝等項亦盡行賞給著納延泰即將策旺多爾濟等貽悞情節告知土爾扈特貝子丹衷王阿寶六旗鄂爾多斯三旗烏喇特毛明安四子部落及遷內游牧居住喀爾喀西邊扎薩克等伊等既在一處居住與喀爾喀內扎薩克有何分別如果訓誨屬下人等不使相奪相盜接壤地方酌設卡倫有一二不

肖小人犯法即秉公懲治則其餘自不敢妄為矣伊等誠能凜遵國法協力勦賊不過勞苦數年將來豈不各享太平之福乎公通摩克屬下人等去歲雖加恩賞但親屬被擄有欲尋求妻子者亦有已身被擄尋求妻子脫回者著交與公通摩克等務令給與妻室家產加意照看如有投來之人亦收留養贍詳詢賊信即報知辦事官員郎中偏圖侍衛常明乃專理西界喀爾喀扎薩克等事之員如有此等人一面交

扎薩克照看一面據實奏聞

命王查木陽會同侍郎納延泰至鄂爾多斯選兵赴軍
上諭辦理軍機大臣等曰達爾濟處遣回不堪調用之
鄂爾多斯兵五百餘名沿途不可無統轄之員著叅
贊散秩大臣四格帶回沿途管束到鄂爾多斯時四
格著回京至鄂爾多斯扎薩克王台吉內能辦事之
人甚少令王查木陽帶四五人馳驛至鄂爾多斯俟
侍郎納延泰到彼會同揀選兵一千名於明年三月

間著查木陽親領前赴軍營

喀爾喀扎薩克固山貝子喇卜坦卒以其子旺

扎爾襲爵

己巳

命以張家口外及歸化城所駐兵赴洪郭爾鄂隆等處

駐劄

上諭辦理軍機大臣等曰張家口外駐劄之兵二千名
歸化城駐劄之兵一千名若令往三旗烏喇特右邊

喀爾喀北界之洪郭爾鄂隆等處駐劄保護西界之
喀爾喀內地扎薩克等游牧實屬有益且可就近調
遣著散秩大臣瞻布副都統哈達哈於今冬帶領張
家口之兵前往歸化城併駐劄歸化城之兵分為三
隊著滿珠錫禮同哈達哈富達禮同瞻布諾穆柱同
綽爾多各領一隊行走若兵丁馬匹不敷令都統丹
晉每兵再給馬一匹揀擇水草好處牧放過冬多派
兵丁看守收厰勿致亡失疲瘦

癸酉

大學士九卿等奏言

聖祖功德常昭

景陵瑞芝疊見恭請宣付史館昭示中外奏入得

旨朕從來不言符瑞時時訓諭天下臣民屏虛文而務
實行是以數年來各處奏報慶雲嘉穀等事朕悉降
旨訓勉未嘗宣示於外以為祥瑞也惟是今歲秋間
準噶爾賊人侵犯北路深入我境我師奮擊大獲全

勝殲敗萬餘行間軍士及邊外蒙古無不額手歡呼
以為從來未有之大捷非荷

上天

皇考默佑何能至此朕心方深感激而瑞芝適產於
景陵天人協應信而有徵仰見

上天

皇考福國庇民特賜嘉祥以昭示天下之臣庶也朕與
諸大臣等同此慶幸歡忭之悃忱著照所請宣付史

館

庚辰

命革岳鍾琪職

上諭辦理軍機大臣等曰岳鍾琪受朕深恩重加任用西陲討賊之舉伊亦身任不辭是以用為西路大將軍一切徵兵運餉選將設官凡有所請無不允行實冀其殫心竭力無隱無欺克著綏靖之績乃伊秉性粗疎辦事怠忽將國家軍旅重務視同泛常且賞罰

不公號令不一不恤士卒不納善言傲慢不恭剛愎自用以致防禦追擊屢失機宜軍務廢弛士氣不振以多年預備之馬駝牲畜數十萬或被賊人偷盜或因失養損傷及至需用之時寥寥無幾而凡陳奏於朕前者皆虛假詐偽之詞為怙過飾非之計其悞國負恩之罪難以悉數岳鍾琪著革職交與兵部拘禁候朕另派大臣詢問

辛巳

定運糧解馬考核勸懲之法

大學士伯經略鄂爾泰疏言肅州當軍需總匯一切運糧解馬尤要所當考核勤惰分別勸懲前者未有定例車馬損傷米石缺少隨時詰責貽誤相仍請自今運糧出口其糧如數完車騾不損者初運註冊記功一次再運如之三運紀錄一次四運如一級五運外委千總准其實授現任千把守備以應陞缺補用其怠玩者以次

記過細責降級革職分別治之至解送軍前馬
匹向例處分太輕且有罰無賞不足以示鼓勵
請自今解馬者以三百匹為一起如馬臆壯無
病瘦一起記功一次二起至五起叙賞如運糧
有功例其怠玩者馬病瘦十匹以下罰俸一年
倍者降一級再倍千總把總外委細責守備革
職並令在肅州帶罪効力奏入

上從之

壬午

命以達鼐所掌總理青海番子事務關防給侍郎馬爾

泰管理

十一月甲申

以軍需採買馬匹牲畜

宣諭喀爾喀內扎薩克等

上諭內扎薩克王貝勒貝子台吉等曰爾等自歸附本朝以來蒙恩覆育如一家人八十餘年安居樂業凡

遇行軍與滿洲兵丁一體馳驅準噶爾賊人原與衆
蒙古結為仇讐是以準噶爾噶爾丹敗喀爾喀時便
窺伺內扎薩克我

皇考以準噶爾不滅爾喀爾喀扎薩克斷不得安居故
遣大臣殄滅噶爾丹又於策妄阿喇布坦備兵防範
此皆爾等所共知者嗣因噶爾丹策零克暴殘刻居
心狂悖朕仰體

皇考軫恤衆喀爾喀扎薩克之意不惜數千萬糧餉駐

兵極邊此豈務勤遠略以快私意乎夫本朝中外一
統即全獲準噶爾之土地人民何增毫末總為衆蒙
古生計安寧起見不得不爾也準噶爾去年來侵擾
時因傅爾丹錯誤以致我兵受傷賊人逞志今年又
悉力領兵三萬前來我大兵分為二隊接戰傅爾丹
一隊失機準噶爾因此益驕欲劫取哲卜尊丹巴胡
土克圖而收獲喀爾喀遂突入喀爾喀地方我大兵
尾追至額爾得尼招地方大敗賊衆殺賊萬餘人賊

惶懼而逃若我大兵此次不獲全勝爾等豈得安居乎準噶爾既已破膽若不乘此進取使賊人乘間復振兵勢併力而來爾等豈不滋擾乎今據大將軍順承親王奏請軍需馬匹十萬羊四十萬山羊十萬俱於喀爾喀內扎薩克處採買已經准行聞從前丹津多爾濟採買馬匹時將臆體壯大者選留羸老者退還爾等便生怨望夫丹津多爾濟採買軍需並非私事若以不任馳驅者塞責伊豈能堪因以撥回而爾

等反咎丹津多爾濟謬矣此次採買之事朕特交與
王額駙近侍台吉協助爾等扎薩克酌量照數選買
送往軍營於從前所估之價加增給付聽屬下情願
不可抑勒并酌給送牲畜人行糧若一二年內軍務
告竣朕另行加恩軍務乃朕與爾等所共之事朕發
數千萬錢糧採買牲畜爾等自當効力資助倘仍前
苟且塞責以致有悞軍需將以為準噶爾之賊可停
其征討乎抑爾等有所不願耶再王丹津多爾濟欲

令新安山後之扎薩克等採買其興安山前之扎薩克亦俱有牲畜著各將該旗內願賣之牲畜若干先期報明倘若山後數目不敷再將山前之願賣者補足如此則軍需不致有悞而屬下亦不致擾累矣

丙戌

命料理吐魯番回民內徙事宜

上諭辦理軍機大臣等曰前據副將軍張廣泗奏稱十月間料理吐魯番回民遷移之事若有賊人阻撓則

遲至來春再作計議等語比來未見西路奏聞想賊人於北路大創之後力量衰竭不能復侵擾吐魯番亦未可定回民乘此遷移似屬應行朕思回民誠心歸嚮屢拒賊鋒甚屬可嘉而冬月寒冷之時倉皇轉徙又甚可憫除在途加意保護外伊等到時務須安插妥貼重加賞賚出其望外使老幼男婦咸慶得所不可為愛惜錢糧起見稍負遠人內附之心也爾等可傳諭查郎阿張廣泗等知之

命以寧古塔將軍常德為北路副將軍

己丑

命詳詢軍前投誠及俘獲者賊中情形

上諭辦理軍機大臣等曰凡將軍大臣嗣後遇有軍前投誠及擒獲之厄魯特并脫回人等俱宜詳悉詢問彼處實信真知灼見則於辦理一切事務俱有裨益如止計聽聞順適而以逆賊勢窮力盡等情引問彼投來之人隨問而供既不能得其實情於事何益著

即行文查郎阿等知之

庚寅

命選牧廠兵赴烏喇特駐劄以馬蘭泰轄之

上諭辦理軍機大臣等曰三處牧廠挑選一千兵於明年青草發生時令往烏喇特地方駐劄著將馬蘭泰調回管轄此兵費雅思哈著暫管推河兵丁

辛卯

命暫緩齊齊哈爾官兵赴軍

盛京戶部侍郎和善等奏言齊齊哈爾所在今年九月二十八日大雪十月十五日又雪雪深草沒官兵難以進發臣與將軍卓爾海等商酌停止啓行令暫居各屬城所明年或赴達里剛
愛或調遣他處候

旨遵行奏入得

旨著照和善等所請暫令居住明年青草發生時著遠過興安山嶺由呼倫貝爾直至克爾倫圖拉地方緩

行休養馬匹務於七月內前抵軍營

癸巳

命達爾濟以護軍統領銜赴推河以欽拜署建勳將軍
上諭辦理軍機大臣等曰商都達卜遜淖爾太僕寺馬
廠人內挑選之兵一千名已將侯馬蘭泰調回管轄
建勳將軍達爾濟人罷軟著以護軍統領銜往推河
代馬蘭泰之任建勳將軍印信著署綏遠將軍欽拜
署理欽拜所掌綏遠將軍印信著順承親王收貯另

派大臣一員前往扎克拜達里克領兵駐劄

乙未

吐魯番回部內附

命封其頭目額敏和卓為扎薩克輔國公餘令大將軍
查明賞賚

上諭吐魯番頭目額敏和卓等曰吐魯番部落遠在邊
境之外去巴里坤軍營尚有七八百里易為賊人之
所窺伺我師難以庇護朕以仁愛為心是以聽其自

便不強其歸順我朝致受賊人之侵擾也乃前歲岳
鍾琪並未奏聞直以己意遣官帶領駝隻前往採買
米石致啓賊人侵擾而額敏和卓與回衆等誠心歸
嚮我朝努力奮勇抗拒賊兵上年賊衆三次圍攻回
衆與官兵併力抵禦不但全城無恙且出其不意乘
間擊刺屢挫賊鋒忠勇之氣甚屬可嘉然賊夷狡獪
異常時以侵擾吐魯番為疲敝我師之計是以副將
軍張廣泗等議將爾等搬移近邊之地以避賊人侵

害前月具奏到日朕深念爾等移徙之時賊人或於
中途窺伺又恐天氣寒冷男婦老幼苦於行役屢降
諭旨令署大將軍等於途次加意防護到時善為安
插務令人人得所此數月以來朕無時不以爾等安
土重遷縈繫於心也今閱署大將軍查郎阿等奏報
回民大小一萬餘口已於十月十四十七等日陸續
起程羣情踴躍計日可到朕心深為欣慰因思年來
爾等屢遇強寇而未遭其戕害今安穩遷移永居樂

土世受我朝恩庇此皆爾等忠誠感格

上天顯賜福佑之明徵也除已降旨令署大將軍等悉
心部署並優加賞賚外額敏和卓著封為扎薩克輔
國公其餘頭目等有應加恩賞授官職者俟大將軍
查明到日再降諭旨著將此通行曉諭回民共知之

平定準噶爾方略前編卷三十二